

四庫全書

集部

欽定四庫全書

集部

彭城集卷一至四

詳校官庶吉士臣馬履泰

檢討臣何思鈞覆勘

總校官進士臣程嘉謨

校對官編修臣朱紘

謄錄監生臣鍾枚元

欽定四庫全書

集部三

彭城集

別集類二宋

提要

臣等謹案彭城集四十卷宋劉攽撰攽字貢

父號公非與兄敞同登慶曆六年進士第官

至中書舍人事蹟具宋史本傳稱攽未冠通

五經博覽羣書沈作喆寓簡亦曰國朝六經

之學自賈文元倡之而原父兄弟為最高司

馬光修資治通鑑自辟所屬極天下之選而任史記前後漢書者攷也其知兗毫二州以不能奉行新法黜監衡州鹽倉哲宗初起知襄州入為秘書少監錢總草制極稱其詞藝其後以直龍圖閣出知蔡州孫覺胡宗愈蘇軾范百祿交薦之言攷博記能文章政事倅古循吏身兼數器守道不回乃召拜中書舍人蘇軾草制稱其能讀典墳邱索之書習知

漢魏晉唐之故其歿也曾鞏祭文有曰彊學  
博敏超絕一世肇自載籍孔墨百氏太史所  
錄俚聞野記延及荒外陰陽鬼神細大萬殊  
一載以身下至律令老吏所疑故事舊章盈  
廷不知有問于子歸如得師直貫傍穿水決  
矢飛一時書林衆俊並馳滿堂賢豪視子塵  
揮云云蓋一時廷評士論莫不共推即朱子  
於元祐諸人自洛黨以外多所不滿而語錄

云貢父文字工於摹倣學公羊儀禮亦復稱  
之豈非放學問博洽詞章奧雅有不可遏抑  
者乎史載所著諸書有文集五十卷五代春  
秋十五卷內傳國語二十卷經史新義七卷  
東漢刊誤四卷詩話二卷漢官儀三卷芍藥  
譜三卷今所存者自詩話以外惟東漢刊誤  
散附北監本後漢書中未見孤行之本芍藥  
譜亦僅而不亡文集則宋史藝文志文獻通

考俱作六十卷明文淵閣書目有彭城集十五冊不列卷數今所傳三劉文集僅有公非集一卷凡詩四首文二十三篇蓋撮拾於散佚之餘多所闕漏即宋文鑑所選者且不盡載其他可知至以劉頴之輔弼召對序誤屬之放絆繆尤屬顯然殊不足據今檢永樂大典所載篇章尚富蓋即據彭城集收入謹撮拾排比釐為四十卷較之原書所少不過十

之一二與新編其兄敞公是集鉅製鴻裁舊  
觀幾復在北宋諸家中可謂超軼二孔而憑  
陵兩宋者矣乾隆四十九年十月恭校上

總纂官

臣

紀昀

臣

陸錫熊

臣

孫士毅

總校官

臣

陸費

堉

擘

欽定四庫全書

彭城集卷一

宋 劉攽 撰

賦

鴻慶宮三聖殿賦

并序 案此賦見宋文興永樂大典原本互有差訛今校改

臣伏見陛下追述祖考崇奉明祀新作三聖殿

以昭孝明功于天下臣以文學中第太常試官

祕書目覩盛事不敢以鄙薄自絀輒作古賦一

篇以歌詠盛德昔靈光景福之作世稱其美麗  
然其所謂壯大不出雕刻畫績文彩之煌煌而  
已又盛道工人之巧民力之衆材木之多金玉  
之偉臣以謂王者有作則必智者獻其巧壯者  
輸其力山林不敢愛其材府庫之聚皆所供億  
也是物理之常不足以夸大臣愚竊陋之若夫  
天命廢興之際聖王授受之符非敏智通達未  
有能究知其始終者固難為寡見淺聞者道也

臣竊大之是以畧所陋而張所大不敢仰希風  
人雅頌之列庶幾有其志云爾

蓋上帝之所以選建明聖命以天位者乃所以享德而  
報功焉未有德盛于前功播于後而其子孫寂寥千載  
無聲者也賢哲所談六籍之云德莫著于有虞功莫隆  
于五臣禹平水土夏姁以家司徒后稷是教是食肇商  
興周歷載數百臯陶大理五刑以明於其苗裔乃興于  
唐若夫董淳耀以攸司奏庶民之鮮食焚山烈澤害服

妖息鳥獸咸若草木允殖固伯益之力焉天報以位俾  
秦周繼於其子孫誣祖不紹去火即水叛禮尚刑法以  
慘忽然猶并六國一天下而不知變于初二世以斃非  
天不相朕虞之後乃其否德得罪于祖而斷棄也惟伯  
益之功未報是以大命復集于趙氏焉五代喪德九土  
分裂海水橫流民用墊溺鳥獸昌熾黔首失職滔滔惑  
惑蓋若洪流之未闕於是太祖乘火而帝繼益之功天  
昨吉土曰惟商丘是為星火大辰之居亦曰明堂布政

之由出潛離隱或躍在淵以有九有百度正焉削禍戡  
亂出民塗炭風揮日舒天地正觀荆燕吳蜀楚越梁冀  
懾威懷仁奔走失氣嘔強者執服柔從者加賜太宗承  
之真宗成之登封降禪矢直砥平巍巍乎邈三五而儔  
儷彼漢魏之瑣瑣曾何比京夫伯益始掌火而底績茂  
宋以火帝興于火墟天之報施豈不昭昭可推而類也  
哉且夫積功以凝命而創業因物以胙土由土以建號  
樂以反初禮不忘其本是故作于原廟建之別都三聖

鼎列大廈以居以答景貺以昭成功俾子孫知厥所由  
億兆仰德而不窮也厥後烈風雲雨電雷震曜儆戒于  
下濫炎流燒天子怵于大異反己正德伏念七年乃其  
有得曰天以德訓予而以威震予依類託諭予敢不信  
夫政不變不足以日新禮不修不足以化民天之示人  
若曰政禮之敝雖祖宗之為猶當勿憚乎改更於是詔  
三事飭九卿和布揆于舊政載損載益以承天誠以舉  
聖職夫既天行而日白矣乃復闕宮獎夫神衷三后在

天對越上穹經之營之不日成之闔偉奇麗所以使官  
寢之勿踰也清閒宵密又鬼神之所都也絮百圍而置  
楹兮度千仞以架棟擇一木于萬章兮顧餘羨者猶衆  
般倭獲人之儔獻巧而林立兮莫不心競而費用巨長  
廊其如城兮闕重門其似洞欒拱棊其如星兮侏儒屹  
其承重如翬斯飛如鳥斯革兮誠可慄其將動闔陰房  
之密靜兮雖六月其必寒闕陽祭之敞麗兮蓋中夜而  
已旦涉廣除而徑上兮每百盡而一級歷青珉之瑩滑

兮曾不得而側立顧風雨之在下兮足以避夫燥濕良  
非人力之所為兮宜鬼神之攸集於是使夫設色之工  
後素之巧想像形容圖寫必效夫其龍顏日角天質之  
顯昂兮臣乃今知真人之異表於是駕鑿輅登玉蚪千  
乘萬騎雲動而景附兮想平生之豫游旂常繽紛以艷  
翕兮鐘鼓軒轟簫管發而啁啾雜魚龍之奇技兮蜿蜒  
曼延於道周百神紛而並迎兮出閭闔而御夫龍舟爾  
乃川后靜波屏翳息風舳舻相銜若複道之延屬兮亘

千里而相通百工備官而夙設兮棹夫謹呼而奏功惟  
吉行之五十兮餘日力而靡窮既屆既止威儀若初以  
幸夫壽宮乃即前楹以修祀事威神如在望之可畏殫  
金玉以備用罄飛潛以薦味帷帳莞簟之安肆几杖筆  
研之儲侍靡一物之蓋闕兮所以廣孝思而盡心志也  
守臣侍祠罔不矜飾既事而旋闕而莫覲列仙之儒偃  
衮之倫迎神頌祇於其側若夫祝融重黎相土闕伯罔  
已喜動乎魄情見乎色護清蹕而睇盛德也巍巍大哉

不可得而記已且夫天命之不忘人主之大寶也祖宗  
之有繼子孫之勿替也茲聖王所以正統垂業超商邁  
周卹嗣錫羨貽厥孫謀使萬有千歲得以晞風而承流  
也遂作頌曰

崇崇商丘大火主兮曰宋之興道是配兮建邦設都以  
有九土兮有皇上帝明德輔兮伯益之功邈不可忘兮  
三聖承承有烈光兮奕奕寢廟神翱翔兮胥千萬年尚  
無疆兮

葺所居賦 并序

治平三年秋京師大雨涌水出民舍多墊壞者  
予所居獨完整無恙及雨止加葺其垣墻因為

小賦

蹟至理之茫昧兮同寓形于一區任所遇之則然兮夫  
孰賢而孰愚彼每正而或禍兮亦用拙而自如雖背阪  
而向隍兮將愈乎廣廈之宴居歲荒落之淫雨兮涌雖  
出而為災汨波流之罔極兮浩瀾浚而無涯棟梁圯而

弗支兮堂壇蕩而為溪何昔日之高明兮今直委而汙  
泥彼攜持之與抱負兮或耄耄之與孩嬰念獨不保其  
闔廬兮亦有朱戶之亡其閑閤將鬼瞰之使然兮固天  
理平其不平也愧予居之僻陋兮豈擇處而淹留四鄰  
聳而逋逃兮恨衆人之我尤福莫大於無過兮顧舍此  
其何求葺垣墻而圻墁兮其托喻以監予曰全生之近  
道兮念無厭其所居云爾

寫憂賦

悲四序之驟失兮哀逝者之不復春與秋其幾何兮霜  
與露其俱續稚呱呱而既食兮墓積草而已宿追音聲  
而在耳兮悼容色而記目願一見而無期兮情可殺而  
逾毒徵圖書於疑似兮索夢魂於因想雖可得其髣髴  
兮嗟暫覩而復往盼黃鵠之怨別兮余猶怊其單飛堆  
朝雉而泄泄兮牧犢子感而陳詩心鬱悒而怊悵兮何  
使予懷之不夷昔聞道於賢者兮雖忘而未信謂生為  
勞役兮謂死為歸人今吾百憂之叢中兮既積月而累

辰何重負之如是兮願脫去而奚因彼冥然而無知兮  
獨甘寢於巨室天地覆墜之不聞兮諒絕世而愉逸伊  
聖言之可徵兮悼吾學之不競不室隙於未兆兮顧飲  
藥而加病遂迷途而不反兮非智士之能竟排多慮而  
去妄兮引至理而自鏡雖既往之不追兮庶來今之能  
定

不寐賦

忱鬱悒其馮中兮何鑿寐其弗夷方永夜之未艾兮廓

靜處而長思悼既往之弗及兮慨來今之曷知緒將絕  
而復續兮精發越而淫移倏四海其再撫兮泯萬期乎  
須臾武勝殷而歸周兮天保定其千億叔且蕪乎三王  
兮仰勤思而有獲孔潛精於好學兮致憤懣於無益樂  
好善而用魯兮孟見喜乎顏色仁弗過於衛頃兮願奮  
飛而不得繫視氛而見祥兮獻肇謀乎虞號彼遠慮之  
與近思兮智與愚皆從其職良民生之多艱兮嗟以心  
為形役君子有不安其命兮小民有不度其力非蚊虻

金華四子全書 卷一  
之嚙膚兮曾內懷於大棘惟昔夢之遽遽兮既悵然而  
獨寤亮伐柯之不遠兮何內履而采固睇聖人之大覺  
兮繇萬世而不遇幸曲肱而自怡兮度無迷於初度

關蟻賦

邀乾履而坤載兮固悠遠而無極叢萬族於殿中兮既  
生生而息息雖至大之可倪兮猶至精之可識諒擅已  
而自用兮羌是非之增積嗟子駒兮何為謚公字小兮  
紛紛而離離好惡利害之發兮誰其尸之憑怒積怨兮

交戰而在斯何矜很之若是兮怙恃凌弱之不移欲一  
究其端而不得兮聊索數而推之夫其列壤分國穴堙  
重襲碩鼠之所不容兮蟬螿不可以徑入豈天壤之偏  
隘兮曾分土之汲汲化飯以為子兮祝腐以為民其生  
孔易兮其衆實殷夫其子孫千億兮固鮮愛而靡親又  
豈有珠玉皮幣兮肇乎禍亂之因若是則鬪其可已羣  
嬉散游足以已矣奪微寡寡何足美矣豈樹之君而患  
亂甫起抑天之有時兮故將雨而不能自止也嗟子兮

汝獨何誅觀世之有鬪兮曾何足以爾殊饗他人之有  
兮慊已之無妄劫於無用兮矜多於有餘一已之不保  
兮顧有志於九區夫豈無大人之旁觀兮諡之陋而名  
之愚也嗚呼

秋懷賦

世量力以為智兮孰不自師其成心不强短以被修兮  
亦各濟其所任蓋周任之明清兮予嘗服於德音性專  
直其似愚兮遂底滯而廢沈惟古人有不遇兮亦奚慨

於斯今昔既冠而從仕兮冀陳力而帥職何日月之不  
淹兮疊疊至乎不惑世與我豈其異衷兮增余懷之默  
默數廢日而倍參兮願自竭而安得將奔而及事兮愧  
初心而變色譬游者之無術兮念愈躁而愈沒荷衆賢  
之并容兮曾介善之不遺辱興廉之末舉兮遂以造夫  
攸司君之門不可以徑入兮既待詔而歷時惟褊心之  
狷狹兮曾繩墨其自持誠詭遇其猶獲兮雖得獸而恥  
之信天命之有在兮非知勇其孰勿疑時既秋而涼風

兮草木落而變衰日月麗於西廂兮蟋蟀迅而鳴悲閱  
四序之代謝兮既逝者之如斯悼我心之弗獲兮起惆  
悵而稱詩

射豹賦

悲抗獨之難立兮何有用之必害不信乎於弗爭兮雖  
忘懷其獲罪齒恒足以自保兮而隕奪於多輩彼南山  
之珍獸喻變化於君子或隱霧而不食亦胥疏而視履  
猛毅資於天成文彩蔚乎自己伊麋鹿之強圉與麇麇

之傲傲雖騰越其不羈固指掌之所昧何衆吠之狎狎  
兮羌朋很而曹戾競張目而涎吻兮衆遮道而覩伺諒  
勇怯之不敵兮非乃心之攸畏忽機辟之潛發兮遂解  
脰而喪精爪牙曾不得而少用兮貽獫獨之成名吾固  
知夫皮毛之為患兮而黨與之足懲嗟物類之相召兮  
必機數之潛用非明哲之周萬兮未有不隳於衆故曰  
剗心去智萬人不謀和光同塵乃與道俱彼形謀而成  
光與飾慧以矜愚材愈大而增累雖微末而可圖

崆峒山賦

并序

臨汝西有崆峒山其下即廣成澤按莊子黃帝  
聞廣成子居于崆峒之上故往見之莊子雖多  
寓言無實然此崆峒廣成適皆同處意其真有  
所謂廣成子者也又大隗居具茨之山黃帝至  
襄城之野而迷皆與崆峒相近事未必皆虛也

予因作崆峒山賦

馳平原之曠曠兮登隱笄之高丘  
林蓁蓁而雲茂兮樹

參天以相繆鳥哀矜而思侶兮獸銜草而羣遊即崆峒  
之舊址兮訪成子之所留烏乎服天下之為至美兮夫  
豈知聖人之緒餘獨修身為妙本兮竊靜默以玄虛何  
軒轅之徇齊兮而猶持室白茅三月而閒居順下風而  
稽首兮曾南面而晏如彼非至人不能以下人兮信崇  
高之巨娛謂莊生之寓言兮羌林麓其未改瞻具茨之  
髣髴兮知大隗之所在嘗迷道於襄野兮七聖偕而無  
悔得要道於牧馬兮稱天師於再拜悲世俗之狹隘兮

疑至言於否衡航污瀆之淺狹兮僭瀛海之浮匯守冥  
與之熒燭兮昧白日之輝曬追古人之不可及兮獨臨  
風而悲慨彼六相之輔治兮曷四海而弗寧名百物而  
垂衣裳兮雲門用而告成尚紆思於荒澤兮勉聞道於  
長生豈在野之不可蔽兮固前修之所營眇抽思而成  
章兮庶來今而作程

慕賦

惟夫太樸之未判兮圓方渾而無際倏物生而有象兮

迺置同而立異迨數起而滋生兮紛萬彙而多事此奕  
碁之始置器也於是乎經緯縱橫封畛遠邇包穹昊之  
度數兮極厚地之疆理局有上於方罫兮信宇宙之異  
此念巧歷所不能究兮茲古今所以甘心而不已也咨  
白黑之相反兮譬寒暑之進退寧我盈而彼虛兮況生  
殺之與成敗智詐敵然而並用兮莫不矜多而務大有  
一言可以行之者兮惟見幾而得先衆蚩蚩而我隨兮  
乃收功於萬全伊昧者之弗察兮雖服膺而拳拳暨應

變而赴敵兮常操末而寘顛或敗形已兆力鬪未悟忽  
焉顛仆兮乃悔其辨之晚暮與覆車以同軌兮孰若易  
轍而遵路或徂快小利死生契闊雖得雋於錙銖兮而  
外勢其已奪或決機兩陣間不容思彼多算其泰然兮  
既先據于便地謂戡敵而致果兮顧自戕而隕斃論茲  
藝之微眇兮奄衆技而首出語之有道兮用之有術誠  
巧拙其天子兮莫可得而齊一貴不能得之於賤兮又  
況老者而不屈太上貴德服不以力審布置以陰陽兮

謹裁度於繩墨故擢之者無抗詐之者必北其次狙詐  
詭為奮其祕算或見易而守難兮或取近而先遠雖僥  
倖而全勝兮亦蹉跌而事反靡精心而極意兮每隨手  
而應疾貪彼虛之可乘兮忘己力之未實竊冀幸於弗  
覲兮故雖獲而逾失何度量之相越兮乃倍蓰而十百  
甘受責而無辭兮雖三五而不敵或騰口而攜詐兮或  
匿智而叵測或同行而習熟兮或旁觀而少得或乘勢  
而亟捷兮或銜利而加惑故每譬於用兵兮擅廟畧於

金史卷之三十一  
卷一  
籌畫必知己而知彼兮保常勝而有獲

詆風穴賦

背崧右洛兮維汝泱泱左界韓鄭兮前關魯陽陵丘曼  
延兮土膏脈良生植遂茂兮厥天且長咨飄風兮胡很  
而狂乘冬肆威兮怒號以常通晝亘夕兮日月奪光宇  
宙昏惑兮顛倒玄黃折枝排根兮松桂毀傷衝空動棟  
兮披戶登堂獸亡其曹兮鴻鵠失翔問誰尸之兮底此  
不祥曰茲穴之詭異兮竊神之機幽嶮窮竒兮狹中不

夷鼓舞蜚庶兮招搖南箕平居無事兮淫樂而爾為歷  
九州而遐觀兮孰樂土其若此獨蠻夷之僻陋兮乃自  
古記之矣邈炎州之荒忽兮汨大海其千里上霧下潦  
兮墊隘瘴癘魑魅羣遊兮樂人之死蓄為颶風兮瘡毒  
疵癘扶濤駕山兮舟航糜毀歷日旋時兮然後得已西  
極曠蕩兮陰磧無垠流沙不波兮瀚海無泉五穀不生  
兮蓬棘蓁蓁熱風之來兮天地翳昏觸肥為瘡兮四肢  
若燔亦幸有老駝之先知兮嗚呼而告言歸命野獸兮

金步八ノノ三  
卷一  
塵焉得存彼鬼方之幽昧兮固宜以然慨中土之與鄰  
兮不僻不偏胡穴神之忍兮固蔽以頑用夏變夷兮至  
于髦蠻外百里而不同兮茲邑獨為匪民帝之高居兮  
臨照在下虎豹服仁兮九閻莫阻巫咸上愬兮帝命斯  
許巨靈夸娥兮幹其絕贅拔山投石兮北海之渚大野  
夷蕪兮八風攸叙號令專一兮莫予或侮蒙常聖時兮  
維民所取穴神雖悔兮夫孰閔汝

彭城集卷一

欽定四庫全書

彭城集卷二

宋 劉敞 撰

賦

案攷序公是集以律賦列之外集今畧倣其意故以律賦列第二卷

畢陶戒舜在知人賦

惟舜德所以大聖非自為其與人而同者蓋擇善而從之執兩竭而用其中志存樂取見一行而莫之禦衆豈避遺緬思古人實惟虞氏審萬物之備我體至人之無

已蓋夫慮善以動則自用者小焉與人同功而任事者  
貴矣察言好問但見其聞斯行之明目達聰孰有夫怨  
乎不以若乃耕稼以力陶漁是親試諸難而興事納于  
麓以明民然後謳歌之所屬歷數之暨身曷注措之天  
若奚持循之曰新夫何為哉徒正面而恭已弗可及已  
常稽衆以從人且夫羣於人者物莫能離同於善者德  
有常主故我總萬彙以兼載人自一言而汎取克協于  
帝是以謂之重華尚論其人斯弗忘於稽古譬夫山嶽

之高也其積以細江海之大也其受以虛蓋與其足已而弗及夫孰若忘懷而有餘求福不回顧明德之若此樂告以道靡寸長之失於然則一心之所謀其智也淺一力之所濟其功也鮮故道莫貴于因衆以寧德莫大乎與人為善不然者安得側微在下九男順而服從登庸受終五臣與而不顯大矣哉不震不盈不伐不矜肆昊天之眷命實億姓之與能是以妣氏承風聞昌言而亟拜子淵希德聆介善而服膺世之人行已也專改過

而吝以出衆兮為可任以遜志兮為必信然後知善與人同巍巍乎其斯以為舜

五星同色賦

德配淳古祥開上天五星之色同矣四海之民晏然驗以璣衡察齊輝於七政偃夫金革啓昌運於千年眇覲乾文俯稽皇國伊天事之常象何聖人之合德時也懷柔乎窮髮之北服叛乎流沙之域人迹所及萬寓於焉太寧和氣致祥五緯由之齊色觀夫寥寥太清垂文降

精靈臺考象而有舊保章啓占而可明遠而望焉若連  
珠之並彩陳其數也告繇區之偃兵且夫仁義修則金  
木為之興祥禮智用則水火由之凝祐羞五事者莫若  
信載四象者莫如土倬彼如明絜然物覩候其色兮若  
一問其名兮有五克明克類喻王道之無偏不縮不盈  
狀君德之周普是以海内蒙福羣生大同韃橐之令不  
顯稼穡之事從隆豈特候於建星當太初之定歷聚于  
東井告漢祖之成功非皇求于列星惟星依于帝者非

星私於我皇惟皇化於天下赫赫垂象巍巍純嘏察其  
軌道黎民仰首以觀乎眩彼交光疇人推策而知也甚  
矣哉天之鑒人也明於視德之逆祥也捷於馨何精禋  
之哲哲顧神化之冥冥彼候以非烟紀輪囷於雲瑞占  
於半月驗光華於景星語象則幽微推數則疎遠豈若  
考五精之同色知七兵之盡偃方將升中而告成功視  
大道之來反

不愧屋漏賦

以君子慎微心  
無所媿為韻

噫治身莫若慎獨求仁在乎表微故屋漏之不媿則君子其庶幾誠而明之雖戶白之甚邇禮無違者豈顏厚以蒙譏考垂訓於前經達嘉猷於戴記謂夫仁也非顛沛之可捨道也非須臾之能離故中庸之為善欲內外之同致然而十目所視惟愚夫知其不欺一室之間獨至人可以無媿斯蓋擇善圖遠閉邪慮深非曰鬼神之處儼如師保之臨仰瞻西北之隅曾微物覩內省光明之德罔憾余心且夫資之深者處之安為之難者行之

慎故不為顯晦以殊節出處而易信達黃中之理常祇  
若以存誠念陽厭之方豈僥焉而終各衆謂之微以其  
弗見世謂之隱以其弗聞蹈先覺而秉哲無慙德而集  
勲適之足以治下遠焉可以事君謹爾燕居自獲申申  
之樂仰夫匪隱罔貽負負之文向若識謝鄰幾仁亡由  
已昧知非乎伯玉違好學於顏子則雖志深媚與寧足  
道於多慙名或升堂亦深虞於可恥是知觀大者莫若  
小責有者始於無則善惡不能以理奪賢愚不可以智

誣美子思之著書誠為治本稽衛后之興刺彼實迷途  
異哉閭與之間尋墨之所猶內深乎戒惕而外齊其居  
處則夫朝廷鄉黨之中復何虞乎失步

雕蟲小技壯夫不為賦

古人之賦詞約而旨暢今人之賦理弱而文壯原屈宋  
而瀰漫下卿雲而沓宕豈所謂言勝則道微華盛而實  
喪者哉觀夫緯白經綠叩商命宮以富艷而為主以劉  
亮而為工家自以為游二南之域人自以為得三代之

風差之毫釐譬無異於畫虎得其糟粕殆有甚於雕蟲  
亦猶樂府之有鄭衛女工之有紉綺悅目順意蕩心駭  
耳里人詠嘆其繁聲婦女咨嗟其絕技亦何足薦之宗  
廟獻之君子哉若乃託興禽鳥致情芻蕘上則恢張乎  
宮室下則吟詠其笙簫且子虛大人之文無益於諷諫  
靈光景福之作不出乎斷雕故白玉不毀珪璋安取六  
義不散體物何有夫殘樸為器者匠氏之罪判詩為賦  
者詞人之咎亦奚足以計得失辨能否也是以子雲以

無益而自悔枚舉以類得而詆諆故曰童子之功壯夫  
不為且使孔氏用賦仲尼刪詩則賈誼升堂而不讓相  
如入室而不辭然無益於王道終見譴於聖師豈非君  
子務其廣大世人競乎微小故為學者衆好真者少非  
龍變乎詩書之林曷蟬蛻乎塵埃之表必若明敦厚之  
術閑淫麗之塗言合必乎雅頌道必通乎典謨亦可謂  
登高能賦宜為天子大夫

敵弓賦

昔桃弧棘矢成周所以服荆楚楛箭石弩明王所以來  
東夷伊敵弓之在御亦厥貢之同歸想夫極北窮髮千  
里無草殺氣之門回復植物於焉凋槁風霜凜乎無期  
冰霰積而皓皓非剛強不能以自存故有生而必老粵  
有喬枚是惟陽幹託巖谷而挺本擢雲霓而上冠理堅  
厚而密緻根盤深而交貫鷹隼晨擊於其傍羆虎暮嘯  
於其畔伊猛毅之攸司雖採擇而可憚爾乃落以斤斧  
附其膠漆弭切象以潔白蕭飾樺而柄鬱錯良金於拊

中績鹿斯之殊質豈既弛而不張諒有直而必屈乏繭  
絲之為絙乃裂革而加裘雖樸質而可喜得漢巧之十  
一矧夫俗本射獵士習縱送騁良驥而夸勇腰箠矢而  
備用馳突乎荆棘之林蘭轡乎羶兕之衆擇肉而後發  
先得而命中皮毛為之寢處滋味得以衆共莫不興利  
而除害便已而自奉也豈比夫繁弱之為分器大屈之  
為宴好顏高之堅和氏之寶載厥美於史冊歷千古而  
擅巧亮萬俗之異便吾安得較美而定客好有系而稱

曰懷柔以禮羈縻以德遠人是以來賓大弓為其貢職  
向使威武不競乎金革文告不行乎邦域是弓也足資  
乎凶器彼人也孰匪其敵國

彭城集卷二

欽定四庫全書

彭城集卷三

宋 劉敞 撰

五言古詩

擬古六首

南轅適郢都日與冥山背  
重生與徇名夙昔不相待  
藜羹采薇蕨芟製蘭為佩  
遊樂天地間安知一身外  
麒麟鬪大荒日食星見沫  
夷齊餓西山咨嗟爾胡罪

澤陂生芙蓉映比蒲與荷彼美不可逢憂心涕滂沱行  
樂在及時株林起酣歌歡宴未渠央國門擁干戈巫臣  
視不悟室家嬰禍羅謀已既不忠孰能為若多

趙王飛龍駕翱翔天關塵土暫反顧金玉高如山自  
喻固適志超遙亡愧顏安知馬服子軍破不得還前亡  
四十萬後復園邯鄲虛盈固天理循環乃無端覺寐已  
不殊何況百歲間嗟嗟道傍子萬金非所安

秦昭登西山恭與火帝游顏林刊喬木詔世為博籌富

貴良未厭夸謾豈知尤投龜詬蒼蒼楚靈輕九州塗窮  
乾谿旁衆散不可留徘徊餓山澤覺失涓人疇新王固  
有命玉衣被累囚

嵯峨三神山浩蕩仙聖游金臺冠絕景玉果垂千秋龍  
伯日已侵巨鼇幸無憂波濤各一隅但見雲氣浮跂予  
望可及隱約清淺流大帆交問津長風輒回舟不怨道  
路邈所悲到無由世主自甘心仙者非有求

老萊隱窮楚因與時世隔暮歸怪車轍夜起避山澤若

金方口石卷五  
卷五  
人不可見況肯低顏色安知叢臺下一旦三千客西邊  
竟不還嗟哉少良畫

讀黃寺丞十月十三日寄原甫詩因同作

寒日流短明涼風起秋色嗷嗷鴈晨翔悄悄蛩夜織節  
物悲旅人天地亦行客心事已如翁但知頭未白黃公  
青雲氣疇昔振六翮成紀獨不侯長沙嘗遠謫賣瓜青  
門外種豆南山側浩歌寫窮愁我預聞損益外事來無  
涯開口笑不得惟當林下遊相存度阡陌

續董子溫詠陶潛詩八首

佳魚樂潛深智鳥不遠飛  
達人避形役逝與風波辭  
逍遙彭澤下聊然三逕資

好酒豈怯情讀書不求解  
天真任自我淳白忘機械  
鼎鼎世上名百年竟何賴

嘉樹每交蔭時鳥初變聲  
欣然環堵居自覺軒冕輕  
予亦葛天民千歲同此情

馬隊待賢士久知喧且卑  
周生自晚悟徂謝仍響隨  
豈

金  
卷三  
若田畝間尊酒時賦詩

時命昔大繆賢傑同隱淪陶公晉卿族晚節恥屈身躬  
耕抱羸疾嗟哉畝畝勤

道術既分裂人人得其偏丹青照千載始覺真檢全爾  
時揚仁風到今猶慄然

貴生未必全徇名良自賊區中共茲患形影相與惑神  
釋乃超然道真於此得

籃輿適山野葛巾傲賓客既無軒冕拘詎可形骸索富

貴能畏人千秋但慙色

偶作

時命有通塞百齡皆謂然流行自非我底滯亦在天人  
知信百齡陰定不可遷苟云有所繫朝旦猶億年天地  
無窮期百齡未為絲朝旦不可期人事皆具前所以賢  
達人放心無所懸萬塗以一究會理寧復偏六月淮水  
深南風阻歸船客行厭滯淫親朋限長川至言莫與聞  
達理誰為詮無以謝羈愁聊作言命篇

效白公詩

不得起厭心厭便住不得不得作戀想戀即去不適厭  
生憎疾業對面為怨賊戀結貪著因轉脚落沈惑上士  
體自然知慧金剛力中人勤埽除補闕塞瑕隙行莫到  
門返饑莫看人食欲驗齊死生且覩居官職

默坐念遊者身存至頭白起行觀病者身健有餘力出  
門視勞者身閒免事役入鄉閱貧者身足飽衣食寓形  
天地間幸已不失職奈何不自休汲汲復戚戚大鵬彌

九區轉動恐偏窄鷓鴣巢一枝隨意翻羽翼馳光無停  
留駟馬方過隙君看北邙山貴賤一真宅

效韋蘇州古調詩

於人無舊新相見常為歡本不作崖岸中亦非斷利資  
僚自了事縣邑無曠官豈惟競勉力退亦絕間言觀者  
以為稀不自知其然吾聞西方說夙世常有緣將此會  
中人厚德無讐怨文人諱異術且以儒事論孔聖不可  
及孟氏固所尊軻云創業易成功則在天乃知古今士

金少川卷之三  
卷三  
無有能與賢達人同衆人，不肯妄自尊。

古意

牛刀割雞，雞未足為深恥。奈何狐父戈，資以斲牛矢。魯人稱家丘，會計當而已。郢匠不揮斤，其質久已死。秉心若松柏，潔志如雪霜。松柏摧為薪，雪霜晞春陽。乃知丈夫勇萬物，無以方。賜分不受命，根也安得剛。

雜詩

重生世所同，徇利良獨愚。嗟彼緯蕭子，安事千金珠。沈

身九重淵脫死驪龍胡得失覺寐間危哉悲矣夫九方  
鳥知祥邇也終奚如雖同國君倉乃在渠公衢餒也命  
使然顏原亦多娛

荆山有奇璞貴乃和氏倚連城詎云多一視以為優攜  
挈向都市光彩傾天球雖無指瑕累顧得千金售驚詫  
遽自反閉匿成千秋豈忘待時意欲往仍遲留凡目陋  
至寶後生異前修蒼蠅矧多變珉石仍先收萬一人我  
欺永為神物羞

樊遲請學稼尼父已深愠安知連城守權酷殿最問周  
公無藝酒用是垂大訓願得烹弘羊耕織始安分

龍伯釣鼇時連六方自快事緣貪餌起上帝獨何罪土  
疆日侵削形軀仍肯殺纔餘數十丈尚足令人駭寄言  
諍畢人努力事機械何當大荒野與爾競行邁

齊有梁丘據晉有樂王鮒據能愛晏嬰鮒欲殘叔譽二  
臣嬖兩朝事君為悅豫景有尚賢志據逆以為助平失  
宥善心鮒乃速其去毋以據為賢易地則同趣丈夫處

世間必有遇不過豈無覺者乎正色君亦悟區區變幸  
徒何忍就朋附

伯夷餓首陽太公封營丘同時海濱人將老歸西周世  
故莽難量後王異前修徒讓千乘邦不如畜陰謀良知  
命分然何怨復何尤塵埃采薇詩益使夸者羞自茲姦  
雄人日日希公侯

虛舟適誰迂飄瓦殊暫然伎心自無怨豈必絕世賢握  
火欲提人唾空不至天一心抱區區萬事長可憐

供女處瑤臺豐肌艷皎皎端令鴟為媒告我以不好猶  
豫令人悲自悔辯不早如何問雄鳩佻巧豈可道

野人構茅茨櫟柱樗作棟不意豫章材一時同見送拓  
手百尺長連軫萬鈞重斤斧欲安施棄置因無用本是  
絕世姿胡為與衆共

臧孫被惡名魯侯失其位軒冕非不尊家富馬千駟不  
用子家羈而棄柳下惠未儀諒何為矧論仁與智竊位  
良足羞乃復為君訟

雜興

阿嫖年八十睚眦事粧飾仍夸少年日自謂美無敵與  
子不同時寥落復異域人事雖萬殊近者猶可測頽顏  
與白頭何日好顏色

讀李某詩

案題為讀李某詩而詩止  
叙李某之事疑有脫誤

李某崆峒人生長西北蕃赤鬢如蝟毛僅能為漢言筋  
力勇自負馬上帶兩鞬作賊十數年身有百刃痕泳河  
不用舟羊革隨輕軒危厄輒自脫天幸尚得存過壯忽

自悔翻然歸漢恩徙家汾水陽百口蒙輕溫拜官隨立功俄列上閣門封侯未可量專城誰復論已見狄將軍堂堂樞府尊由來功名際鵬鴉勝皇鷄富貴百惡除詎問鉗黥髡豈與詩書士履繩不敢奔終身蹈薄水衆口猶喧喧

王四十處見舅氏所錄外祖與日本國僧詩并此  
僧詩書作五言

滄波浩無涯決滌際朝日安知鮫魚淵而有邑居室便

風送來颿風昔多人物始信天地間見聞豈云悉惆悵  
蓬萊說胡為浪自黜夷倭與侏離九譯迷彷彿書問顧  
已同紙墨存落筆俛仰六十年舉指不任屈好事見君  
家聞詩初未失杜鄴富小學平通知祖述鄙老獨何能  
執書幾涕出

偶題

旦出輒暮歸終年長役役自顧若有營誰言了無益少  
小不如人老大轉衰僻昏忘復相仍十事不一憶勞心

非所長但覺安坐食使我忍媿羞不如學勞力勞力當  
自耕自耕還自織百畝為己憂雖憂乃易釋

喜雨和任判官奉呈太守

原注先是司天臺上四月朔日食及是大雨不

見

愆陽歷冬序入春日光赤原野為之焦無復青青麥明  
廷郵農功詔旨懷愍惻誰能共此憂惟良二千石禱祠  
遍羣望百神潛率職迅雷出深淵密雲會將夕應龍不  
無神女媧罪所極滂沱浹寰宇宙變化纔瞬息矧茲艱窮

意豈獨垂沛澤嘗聽君平言以茲消薄蝕周宣成陽事  
往往在簡籍不聞二美具介福逾萬億三農耒耜出自  
此豐黍稷使君憑熊軒勸耕駐阡陌上客歌吉祥清文  
綴環壁我豈擊壤翁不能知帝力斐然遂成章聊用同  
悅懌

贈周員外鼎

束髮去鄉里白首還舊丘曾無高蓋車願為夸者羞歲  
晏東臯田躬耕方薄收知君近有道足以無外求

次韻和王平甫贈張舍人

原注王時在城東佛舍讀書符應舉張與呂推

官過

之

通物樂自任濟時常後安  
戢翼思迅風騰鱗慕驚瀾  
天書進廉良大器綱目寬  
頃來中林士繼踵青雲端  
王侯經緯氣錦繡羅肺肝  
念當五鼎食肯甘一瓢單  
著書成揣摩脫劍橫  
鏌干孟明已焚舟廉頗方據鞍  
閉門謝塵軌釜魚朝未殮  
竟完稽古力已使同學歎  
鳳池響鳴珮芸閣我高冠  
忘年義已深踵門情更歡  
縱談劇流輟處

畫逾轉九廣廷來風清落日微雨殘涼泉為灌溉佳樹  
聊盤桓長歌爛篇軸大盟粲珠盤寧為端木子矜此道  
旁觀

閔雨

山上田萬頃江中水千里東流自瀰漫旱苗日焦死惜  
哉不能救地勢正如此雲雷未興潛蛟龍困泥滓昭回  
雖在天歎息真已矣

君子行

金少曰  
卷三  
君子貴自然不為時俗觀升車不廣欵即席不變顏疾  
驅不駭轡高張不急彈塵埃視流俗中立何可干顏生  
處陋巷求仁得所安簞食一瓢飲孔聖推其賢

雨中

丹桂更束薪白壁償斗粟  
沉茲風雨朝泥潦壞牆屋敗  
竈方生魚并日能薄粥始知簞瓢人  
陋巷本自足寧見  
子桑詩若歌復若哭

游景靈宮

漢家祈年宮玉宇黃金堦回廊起層城高閣橫蒼崖  
觚稜拂星斗廣除霽塵霾清渠寒泉交盛夏涼風潛火雲  
赤宇宙道途若燔柴幸茲清涼遊復此朋友偕前殿朝  
衆靈瑄玉茲禋柴顧予塵土姿進拜增慄齋掃庭有餘  
潔酌水欣素懷並坐俯堅珉長吟翳高槐丹青四壁畫  
權輿自軒媧千年羽化人志怪非齊諧始知慕神仙自  
顧輕形骸聖賢幾吹呖寒暑一病痲學道賴遠復養生  
知有涯悟真覺理勝適志忘事乖伯陽推谷神莊叟稱

金  
卷三  
安排英風摩蓋壤遺躅欣吾儕飛雲肆冥鴻拘井嗤沈  
蛙虚心自茲得歸去顏色佳

惠州豐湖

昔在葛稚川求為勾漏令丹砂頗易得羅浮聚仙聖窮  
荒非人情適已自無競千歲若須臾斯人已遼曼忽聞  
惠州守修舊有佳政漲泉作豐湖百頃湛明鏡芰荷爭  
秀發魚鳥恣潛泳新疇日已多耕者樂其盛高齋面空  
闊寫影窮絲淨長嘯來清風炎蒸亦無病勤憂本劬農

爽豁賴怡性寧須學神仙豈必謝朝請明珠還合浦風  
昔人相慶君有近郭田足繼甘棠詠

柘湖

南海浮柘山嘗試問水濱桑海變未久婉孌茲為神昔  
聞仇池穴上有牛女津物理寧可窮空驚舟楫人

東關山水

青靄望不極連峰如置闕不知清溪水漾漾出其間孟  
夏江水深溪流正西還崖根亂石多散激聲潺潺雜樹

色相映密竹不可刪造幽覽衆妙撫事清心顏洄洑自  
多魚網罟羅前灣幽人閉上方繚逕纔可攀疇昔新安  
江寤寐龍門山目擊暫有遇絕勝猶班班客程非趨時  
淹泊寧所艱少留盡餘興更伴浮雲閒

坐嘯亭納涼

長嘯振林木半空鸞鶴聲清風蘋末來孤月海上生坐  
久物色改如有神仙迎

東芻

束芻食騏驎斗水活蛟龍  
轅下雖可哀泥蟠未必窮  
解驥就衢路借龍起雷風  
寥寥四海廣去矣君安從

題常寧黃令灑然堂

叔度萬頃陂清濁誰能料  
割雞用牛刀吾亦寄一笑  
示我林下詩筆力勇奔峭  
故知才者心玩好必同調  
岑岑青玉竿千百壯非少  
清風掃埃塵日影金色照  
環墀發寒泉霜劍初脫鞘  
枕流不枕石俯仰窮聽眺  
上堂梵唄聲空寂總衆妙  
茲亦忘言徒領理會其要  
翔禽竟來集

狐猿遠相嘯不作問鵬翁刻意湘纍弔

十月一日

十月西北風肅肅天雨霜節物感人多客子心內傷心  
傷鬢髮變引領望故鄉故鄉多喬木丘壟生白楊柏葉  
自宜翠草根今已黃且思歸陽陂暮憶栖後岡況此佳  
辰朝都邑事有常平明重城開車馬如飛翔貴賤同一  
丘蒿艾連石羊慟哭朔風悲一豁沉痛腸奈何守微祿  
局促限一方隳官固非孝捧檄固已狂龜兔聊自抑涕

流浩沾裳

吹臺

梁王遊賞地喬木空白雲無復歌吹響況乃麋鹿羣梵  
刹擬化出山河如綺分北望十二衢佳氣正綢繆賢者  
而後樂固如孟軻云感此多遠懷因之濯塵紛聞君已  
先我攜手皆能文置酒臨滄流披牕翹南薰由來登此  
臺寂寞誰獨聞慷慨作歌詩悵然哀古人千載豈不遼  
忽如波沄沄適意正在飲無為惜酣醺

送歐陽永叔留守南都

白水帝舊里大火天明堂王都異豐鎬原廟崇高光畢  
命繼三后商邑正四方保釐自古貴僉曰朝論昌前旌  
烏隼旗左佩麒麟章阨途亂鏡吹先路交壺漿風物盛  
山東令人憶游梁緬然嚴郃徒賦筆嘗慨慷廢池掃清  
冷舊苑開荒涼終留相如坐一伴鳧鴈翔

竹牀

炎光裂厚地江漢如燔湯閉戶樂甘寢婉孌在一牀問

我何獨爾愛此編竹光側身照琬琰熱手循雪霜有時  
萬里夢倏往浮湖湘遂令傲軒冕彌日慵下堂昔聞負  
暄老意欲夸天王我亦悲世人觸熱趨道傍

南憲詩

習靜覺自逸養恬遂忘儉始知一席安不比千乘忝微  
風觸喬木清氣襲珍簞心空物莫喧神超夢無檢簞瓢  
敢望回絃歌欣與點彼哉晉楚富吾道安用慊

抱書南窻下日午天光亮陰陰夏木長翹翹巢禽啜因

卷三  
之三  
之省疎慢亦喜就閒曠散帙寄忘懷曲肱從所尚臨文  
眩今古撫事雜歡悵勞形竟何為有心得非妄釋卷忽  
自娛收視已神放遠從華胥遊却立鈞天上萬緣倏皆  
空至樂了無狀悲哉俗學徒頭白迷歸向

登慈佛寺

原注宋大師造  
號宋芒兒者

清溪淺褰裳嘉樹大盈抱古寺向百年地幽景深好連  
峰拱蒼翠秋雨洗窮昊客至登高樓西風動衰草雄豪  
昔未遇飢粥殆將老豈知風雲期草昧及天造杖屨城

下邑傾困載金寶良知積困約固不慰枯槁銘數久猶  
存餘烈漫浩浩空餘祇樹園常此伊蒲禱階除稍蕪沒  
梁棟乍傾倒顧覽為徘徊物化那能道

築室種樹

築室非我鄉種樹非我廬未嘗三年淹勞力豈不虛遠  
嘉叔孫子去故情若初此意人不知嗟哉賢大夫

和王絢道贈高七植竹

人言植物中唯竹類有德虛心道所存外勁禮自飾風

霜不改陰一何金玉色丘澤無變根還如古人直繁花

宜無實所待鷓鴣食卑枝亦可栖不許鷓鴣息為君栽

管籥於此諧金石為君度短長於此齊尋尺

原注律歷志十文為

引用竹為之

濟川倚巨楫扶老杖輕策大厦莞簟安射侯弓

矢力乃知天材美固待君子識飽聞崑崙秀盛說瀟湘

碧豈曰生不遷念當厚封植惟君傲聲利心遠地更僻

擇交獨此君開選如三益清風共忘言明月為莫逆還

當掃塵榻會待遺名容

涉伊水宿寶應寺

日夕車馬煩路絕臨清伊雲光與水色極望相逶迤飲  
馬清泠泉涼風吹人衣白石可歷數遊魚仍俯窺淺瀨  
乍褰裳榜舟亦遲遲古木號亂蟬白鳥時獨飛上方兩  
高閣向水雙朱扉迢迢際煙霞安得青雲梯暝投中峰  
宿四山凝夕霏鐘鳴衆禽寂孤燈明翠微

彈鳥

夷羿射赤日霍然落天衢獨成萬世名皆曰摧九鳥偏

仄慨時俗臂射妨四禺誰能鵠鷺間計校死與枯孰謂  
黨頻頻莫黑相為徒何用知雌雄攫肉爭謹呼控弦非  
百鈞投丸匪明珠棄捐不俟時詎比墉隼誅矯翼似知  
機回空如改圖但使庭戶清何必殘爾軀念無網羅禍  
寧當怨除驅吾廬正深沈嘉木多桐梧萋萋映朝陽會  
待鸞鷖鷗

雪中退朝與諸同舍登秘閣

密雪晦空曲天作白玉京都城百萬家漠漠浮雲生東

帶聽鳴鷄謁帝開  
承明脫身塵埃外  
自覺肌骨輕歸從  
諸仙子笑語來  
蓬瀛仰望策府高  
天祿鬱崢嶸  
步登雲  
蜺表俯視朝日晴  
寒門杳無涯  
珠宮聯五城  
珍木皆後凋  
冥鴻亦同聲  
還因閭闔風  
共此夷曠情

清漣閣

平湖侵危臺  
天水相競入  
縈迴古嶼間  
空闊衆境集  
大邦屏東南  
開府記百十  
勝遊雖日來  
面勢忍遺葦  
能聲  
紹豈弟敏政  
常暇給喜聞  
棟梁新甫見  
規模立橫空  
眩

藻麗構迴愁，蝶皮居然心意會。似匪人謀及草樹，亦增  
華神明非舊。習青疑夕霏，翠冷激迴風。濕去鳥指暝，飛  
潛鱗視幽。蟄達生貴夷，曠外物辭妄。執臯壤正欣，然蒼  
波仍可挹。雖云吏隱最，世復登賢急。徒使棠樹詩，千秋  
意相襲。

歲寒谷

高松含悲風，綠竹帶凝雪。碧落翻怒濤，深崖墮寒月。蕭  
條非人境，合沓隱城闕。爽氣露草木，精神立毛髮。初無

隱居迹似為吾人發世事誰得捐相從理營窟  
長松過千尺好餘萬丈材上有積雪翻下有清風來四  
時景常好六月凍不開何事吹燕律獨令陽氣迴

過開元寺

晨霜聳喬木初日明廣庭俯巢鳥鵲馴步逕莓苔青即  
心百慮擾造境衆獨醒安禪到無悶看畫匣已經梵音  
騰潮波幡影垂流星天花雨貝葉帝樂飄鳴鈴勝緣此  
邂逅法界俱清冷世喧暫回首但覺塵冥冥

久旱

山城帶嵩高常候嵩高雲興似焚柴雨注如翻盆田  
萊數百里下澤猶平原雖有耕鑿勤不如霖霖恩哀此  
民生微所賴芻狗仁乃知丘陵外獨有五岳尊今春苦  
淫霖宿麥纔厓存過夏乃不雨窮秋氣如燔象龍杳無  
藝巫鼓空屢奔豆苗落為其藜莠乘冬溫黔首困粒食  
或有茹草根賣牛供租賦不忍聞此言此事亦神羞誰  
能叫其閭登高望連峰正見朝煙昏

欽定四庫全書



彭城集

五

彭城集卷三

欽定四庫全書

彭城集卷四

宋 劉敞 撰

五言古詩

寄題漢中三亭

原注時伯父守漢中

梁山屏西南漢水相縈帶古惟千騎居今亦一都會守  
邦多偉人按節森大旆治聲我家貧能事斯亭最蒼峰  
上盤雲清川近瀉瀨隅分地俱勝鼎構勢爭大扶危新

棟梁增舊加粉繪功成人不勞事得文無害長塗擁行  
輶高宴羅羽蓋開筵攬錦繡勸客喧竽籟陪遊慙望回  
請賦嗟自鄒安得凌風翰徑厲褒斜外

養生

世自不乏我我亦安慕時形骸與軒冕冉冉相背馳守  
約道可學戰勝心自知雖無一朝樂亦免終身悲

崑山

茲山本無玉而有崑丘名若人東南秀遂馳終古聲藍

田亦若初荆山高不傾嗟嗟九原骨千年不重生

正月四日燕飲江氏

獻歲發春陽青燁煥城邑羣公三朝暇冠蓋如雲集主

人高陽老

原注江氏北人

饌客素豐給開門陳壺觴從使來者

入春盤具柔蔬香稻進玉粒高談劇傾波縱飲甚啜汁

戰碁效軍實度曲儷風什歡窮壘不空顧惜馳景急東

風卷初雨決漭天地濕震雷動龍蛇稍復離幽蟄而我

獨何為無聞既三十人生行樂爾身外非所及

五行王相詩

長生不我欺幼學每自堅沐浴蕙蘭芳呼吸朝霞鮮冠  
帶謁紫皇左右賓列仙臨官太清上拜賜玉案前帝王  
固陳迹聖智不足甄衰容了成稚白髮倏更玄病笑留  
侯晚妙許成子賢死者不復作塵埃殊可憐墓隧侵人  
居海水為桑田絕跡自此遠飄飄周九天胎化兩珍禽  
羽翼為我先養志幸有成眷言慙自然

自蔡河至陳州

舟行過林樾密樹相排擠仰視青冥天飛鳥猶不移臨  
流方浩歎照水分鬢眉三十有二毛中腸默興悲

除日得王深甫書因寄

除日令休吏官曹停簿按深居念馳光忽忽自興歎七  
十稱壽翁我今已過半時命豈不知胡為此羈宦況茲  
山野性放蕩破崖岸應接人事間何時無謗訕屢誦小  
雅章懼為朋友怨忽傳故人書遠道情不問上言久別  
離下有加飡飯贈我新詩謠金碧光凌亂鷓鴣不鍛翮

龍虎謝鞵絆乃知韝上鷹不及蒿下鷄往事那復追來  
今猶可諫終當潁水濱躬耕為爾伴

之官廬州初至儀真寄原甫

家居非不歡祿仕亦豈急愧身無所勞而茲養生給方  
剛幸未艾黽勉冀有立謫智無遠圖挈餅庶云及聖教  
非一方吾愚寧妄執所慙鷓鴣微不過枝與粒悠悠我  
之思去去異鄉邑大江浩東流客悲莽交集登船眺洲  
渚暝色際日入鬢變誰昔然悵馬寄茲什

將之官清水李廷老來會探韻得光字

四十身無聞忝官省中郎未嘗學治民繆假銅墨章置  
我所讀書低心課農桑況此戎馬間屬國皆軍羌隴山  
一何高緹羣正相望聚糧三月過始厭西路長故人矜  
我勞置酒客滿堂固知後會艱慨慷俱畢觴天弧射狼  
星旄頭爛垂光分我一漢節繫取穹廬王

江南曲

江南多芙蓉水綠看最好輕舟浮江來白露秋意早露

白秋已晞游子行未歸采香欲誰贈但見羣鷗飛鷗飛  
不避人思我平生親當親而返疎悵望空水濱

題歐陽永叔新鑿幽谷泉

江南多名山少有瑯琊比琅瑯盛泉石晚得幽谷美將  
非造物者留以待君子乃知智且仁必好山與水公有  
高世材比山共森峙公有濟物心比泉共清泚泉始居  
地中隱塞未如此今為萬丈流近自一勺始東浮滄溟  
廣下益松檜喜奈何公之惠及更局千里安得從公居

曲肱偃吾几安得從公遊枕石洗吾耳是非付天壤塵  
事如脫屣當為谷中叟肯為軒冕起

張六至

君居衆人裏有如珠玉然世疑假渾沌我識真神仙獨  
抱瀟灑意不為勢利牽少留衡門下談笑忘吾年

題園樹

看花前日雨吹葉昨來風羈旅淹留際年光瞬息中今  
朝雪消後重見樹梢紅

先泊龜山夜聞後來者

秋鴈去極浦寒星落遠山  
太虛混茫外羣動有無間  
中夜數聲榜孤舟何處還

次韻和蘇子瞻贈王仲素寺丞

龍虎不受羈鸞鳳不啄泥  
仙人雲濤觀俗子閭巷迷  
念昔喜讀書五車號輕齋  
東瞻識津涯西顧分町畦  
博物辨鼯鼠誦賦嗤雌蜺  
軒冕不克求舌在徒問妻  
世事莫相告慕虛但攀稽  
賴有逍遙篇爾來頗思齊  
道真本微

眇至言乃筌蹄壹氣中夜存大方利角圭勉從赤松子  
定有青雲梯非若朝市門強力相排擠晚友王子喬如  
得照水犀因之喻蘇耽衰暮母噬臍緬思滯天柱雲白  
風淒淒築居留四鄰與子參杖藜

次韻和原甫登禪智寺上方院二首

訪舊起廢境賞心如此回平川似曲沼崇岡象層臺前  
騶經林藪飛益凌崔嵬漏遲日向永景照春已來即事  
有餘勝懷古常興哀寥落江都宮壯麗安在哉方昔盛

歡娛寧知名已頽一詠宜春賦悵然為停盃

夫子信與點賜也敢望回遙知成春服復此登春臺一  
水近清淺衆峰遠崔嵬林端白雲暝竹下清風來谷深  
鶯徐轉川迥鴈仍哀賓至賦樂昏觴行詠康哉詞鋒與  
醉墨餘響若底頽何以喻珍奇繁露將玉杯

次韻和張屯田新年六十九

春風數盡九節物都非舊幕府省文書堦除減奔走慵  
憐啼鳥喚老藉高花誘前林通杖屨小榭勤箕帚喜逢

張公子七十健少有解吟長韻詩不避盈樽酒困倉年  
殺實鄰里均石斗拱圍畦隴成餘力到花柳長為子孫  
主擊壤歡百口

人日同弟姪會賈夷叔遊射東園和仲馮以退之  
弄字韻次用

宦情本羈旅節物猶戲弄欸見林下風初開水濱凍登  
高舉遺俗剪綵隨衆用暄和暢四體杖履率羣從觴酒  
從我來林塘復君共捷奕判死生勁弓嚴縱送新萸綴

高柳潛穎發枯封  
天空鴈相喜泉潔魚始縱  
馳光若漫漫來事常惇  
惇君看飛雲陰既去不可重

從劉園至澄心寺

春泥稍已熟鵲鳴天氣新  
野竹自有徑空林不值人悔  
將車馬來鷗鳥未可親

獻歐陽永叔

毛生重九鼎劇孟雄敵國  
布衣未易輕壯士多感激  
遍讀近古書仰求當時人  
膠絃非工聲直釣良苦辛  
舉世

無與游行且三十春豈乏富貴士相視猶埃塵屈指東  
諸侯側聞廷中臣霜毛九臯鶴絕足大野麟往者移太  
常正氣橫蒼昊連翮少垂翼浩蕩俄縱鱗天衢自茲亨  
要路實有津諫疏必焚草王言粲如綸雲霄入顧眄方  
牧寧遠巡豈惟國憂賢固是材致身南金一銷鑠荆玉  
成瑄磷少留股肱郡不廢廊廟珍道悠任逾重文雄聲  
益振指掌五代論藻鑑盈門賓信陵虛左乘程子傾蓋  
親意氣已然諾許與忘舊新孤劔雖蒯緱丈夫不羞貧

金匱山房詩集 卷四  
願言敝緼袍試託狐貉鄰往無鮑叔知那識夷吾仁母  
令箕山客洗耳茲水瀕

初冬晨起作四聲詩

霜風吹簾櫳天高明星晞鄰雞三號呼林鳥皆驚飛嚴  
城開重門危冠馳輕肥疎慵徒安眠隆冬方無依

右平聲

營居依蓬茅在我頗顯敞陽暉餘朝溫野景有遠想年  
華無淹停俛首已古往全生誰為賢偃仰與鞅掌

右上聲

山林何時歸陋巷似好遯通衢皆高軒竟歲謝訊問行  
歌聊逍遙衣敝信命分殊勝蒙塵埃勢利強自困

右去聲

開門誰頻來設榻得逸客明窻容棊枰日仄熟藿食叢  
蘭香襟裙雪色覆轍迹忘形非無緣拙直獨莫逆

右入聲

舟次淮陰寄張郎

風波不可測，夷險繫所遇。泊舟淮南岸，始知散千慮。高  
秋風蕭爽，日夕稍寒霧。漠漠烟水深，翩翩飛白鷺。值景  
信所貪，有懷勞反顧。何時見歸艍，嘯吟成一助。

記夢

光彩曜白日，笑語凌高風。冥漠分永訣，夢想如暫同。當  
寐詎知覺，視色旋成空。達性悔不早，百憂坐相攻。

夢楊十七

昔游梁宋都，偶與夫子並。爾來各分飛，豈獨歲月永。往

事若有亡魂交幸俄頃如從杏山宴坐弄南湖景置酒  
腸已開論詩心為領君言此會難驚悟卧南郢人生日  
月內覺寐誰能省適心故為歡好夢亦所幸自吾客遐  
方塵事久幽屏乃知逃空虛終日思咳聲

張君以六十九作詩自道其康寧余時年五十九  
感而自詠

新年五十九處事覺陳舊敲石火難停下坡日如走詩  
書本拙畫孔老徒善誘誰為萬乘器謬享千金帚爾來

專城居遲暮亦何有此邦白髮人夫子稱祭酒貧居玩  
一瓢健飲輕五斗愧君十年長顧已甚蒲柳方將外形  
骸餘事勿掛口

送汾西高長官

堯風遠以深千載殊未央寥寥蟋蟀詩在晉謂之唐今  
君試宰邑正復汾一方民社非不榮腰有銅墨章安得  
六七十而非諸侯邦翳翳桑麻區雞犬音相望因俗固  
易治學古子所長勿蚩儉以勤葛屨徒履霜暮年會有

成坐見鳴鳳翔吾知尹翁歸治迹由平陽遠道悵分手  
游子懷故鄉離羣以索居愧慚參與商

原注參與商曾子  
子夏名也二子

皆居西  
河故云

### 送陳同年遊固陵

送君固陵遊勿憶炎漢初天地不中裂雄傑爭鎔銖追  
兵下陽夏百萬風雨俱鴻溝不可恃平分知厚誣叱咤  
梁齊君王業成斯須鬪智不若諉小信良區區爾來數  
千歲英氣存信書山川未改舊壁壘皆丘墟寄心阮嗣

宗撫掌當踟躕

汴上二首

渾黃下湍流地勢東南瀉  
潛石激陰怒烈風鎮相假  
容行何艱哉極力無可者  
永路未遽央扁舟安得捨  
端思九衢塵快意堅車馬

客從江湖來風水畏難測  
行行汜渠上牽挽意不適  
驚湍卷前灣怒浪潛亂石  
至柔動必剛況使相推激  
隨波歎異心枉道復退尺  
顧思掛高帆勇往逾箭射  
行險何

足憂萬事亦天力

望九華山

初行江南道山水皆可愛忽見九華峰瑰竒又堪怪去  
之百餘里青翠若無類羣山特徵茫此起視其背初疑  
楚人劍真能倚天外快意入浮雲恥令白日晦又如羣  
游龍垂胡飲江瀨俯仰令人驚頃刻千萬態未知瀟與  
霍何能配嵩岱得無失其真吾為古人悔山中多良田  
泉源得灌溉頗思藏其間將家事耕耒塵氛未決往暫

若觀畫繪日暮飛鳥還臨風久伫凝

晚春登樓

川原自不改春事已疇昔衆芳生晚綠遠樹森重碧流  
鶯歇復歌乳燕飛暫息對酒獨慷慨惜無同心客

和謝師厚鵝詩

君為田鵝吟哀彼田鵝艱無舌以自鳴銜恨安所宣我  
徵古人詩得之唐國篇苞栩何足哀悲在不得言君看  
鷓鴣鳴衆芳為不蕃黔雷詎有知奮此亦已偏萬生詎

可窮孰能厭多聞  
頗識鳥獸名  
從子求諸田

邾園水閣煎茶

溪梅已爛漫  
溪水方綠淨  
惜春聊插花  
愧花還照影  
淹留待烹茶  
初覺晝日永

登瓜步魏武廟

陰崖不見日  
側逕劣容步  
鬼神宅  
冢真與物  
隨繪塑  
惟惜飲馬  
初想見  
投鞍處  
木落山  
勢高  
潮平洲  
渚露

華山隱者圖

六王昔崩蕩秦帝按劍與虎爭四十年方隅為之平豪  
氣竟未已用民如不勝因河既為池起洮復堅城嘉哉  
諸老翁攜手西山行避世往不返逍遙塵外情明星備  
灑掃巨靈為友朋饑食玉井蓮手攜三秀英世事一朝  
變龍蛇復縱橫石火咸陽焚蟻聚成阜爭致身青雲外  
顧視不為驚萬椿乃須臾安知谷為陵爾來見圖畫真  
氣猶冥冥世人但蓬蒿安知鴻鵠征桃源迷去路蓬萊  
浪知名異時三峯遊會當慰平生

詠史

原嘗四公子養徒各三千金玉棄如沙快意當目前好  
士要盡心安知悉英賢雖非霸王資豪氣故翩翩生為  
戰國雄死亦名千年晉重未反國曹鄭方接連靳惜冀  
土間不能捐一錢宗社幾不食惡名高屬天山樞刺昭  
公死矣悲宛然如何萬乘邦徒為人所憐

秦兵謀大梁決河灌夷門百萬皆為魚閭里無一存不  
用無忌謀人人皆有言天方縱秦毒蕩滌乾與坤雖得

阿衡佐誰能救崩奔政先起羸禍指鹿遂亡秦翟義為  
漢謀攝省因即真為忠豈不難殺身亦已仁天道良悠  
悠成敗難重陳不見商山翁采芝樂全真羽翼安儲皇  
天子不得臣

晚歸望月

落日隱城頭深林已微暝相攜步明月詰曲穿繚徑稍  
稍歸鳥栖四風亂鐘磬

六月七日大熱及曉微雨

宿雲晦城闕曉雨生微涼綠縹草木潤清虛塵土香宇  
宙暫掃除曾襟豁軒昂忽如沉疴去飄若凌風翔適物  
能須幾執熱每相望永愧江上翁終歲浮滄浪

苦熱登樓

高樓亦炎蒸况乃棲之下念彼生民微粟粟盡蝸舍上  
天無清風何以逃永夏顧余更緼護眇然用悲吒火流  
暑當反日暝天欲夜我躬且自閱於此猶閒暇

秋熱

蒸暑淹南國季秋如長夏炎涼亂平分天地錯常化短  
日迴朱光六龍頓其駕曠似山澤焚憚我如不服反思  
歲聿暮却顧且輒夜寧忍窺昆蟲干時事矜詫

夏夜月中

靜夜收衆響南軒卧虛寂繁星粲文具初月懸星壁流  
螢急自照露華重已滴鬼神頗虛無觸事生慘戚兒童  
戲相驚庭有玄冠客夜久待不來微風動松栢

苦熱

生長自吳會北遊逾十朞來還遂衰老衰老何用知六月江湖間煩炎若蒸炊疇昔不憚暑今者殊畏之織絺置如仇羽扇常自隨對案不得食膾炙成瘖蒸憶我童稚歲烈日猶奔馳鬪草出百品承蜩蚋喬枝頰頰不待濯流汗始為嬉自憐筋力便豈謂天序移往聞終南間盛夏含冰漸將家就高寒長與早濕辭

酷熱

堅冰念陽和廣莫思柔風天事有馴致星火俄復中飛

烏炎千里義叔頓六龍焚林墮翹翹沸鼎愁噉喙路傍  
在家田偃倮頭白翁惡木不得息百畝為己功如何富  
貴人方借明光宮

秋熱

百里異風土我行豈蠻越中星正常象未與京洛別肅  
霜乃溫風授衣甫締葛林蜩沸如羹芳草香未歇天令  
不可推有時倒生殺九土皆若然蒸灼何由豁憶昔過  
秦隴連山看秋雪陰風鴻鴈號積凍松檜折驅車渡河

洛反顧尚明滅大笑咫尺途居然異寒熱

次韻以道月中作

月從海底出素景天外來解道千里共斯人安在哉洞  
庭木葉脫未央簾幕開顯氣徹霄漢炯炯不受埃羣居  
笑李白獨與影裴回顧言常相親無使手停盃

和孫少述雪

同雲晦天地浩然自生明蕭條喬木風斷續過鴈聲衰  
公卧深巷意得神亦清豈知長沙客漂泊萬里行餓隱

賤祿仕乃見終古情

別黃子溫

田園不過歲羈旅常苦心問君長沙客幾年陳武吟白  
髮映青春天涯一相尋傷弓雙折羽遲暮多哀音平原  
客如市珠履玳瑁簪擔簦義何勇歸袖羸黃金世事不  
足道丈夫多陸沈何以慰別離春酒方獻斟

別王深甫

四海不易遇各自東西人那知汝潁間三歲為比鄰愛

君故清真有以敦薄鄙亦作酒客難調笑鴟夷子一旬  
輒攜手曷日不寄聲相期此胸中無若平生情士貧非  
農商敢憚抱關役經術又不如空愧上書容飛鴻羈旅  
懷流水離別心長因東南風一冀子微音

與孫巨源蘇子瞻劉莘老廣陵相遇蘇請賦詩為  
別各用其字為韻每篇十韻

都城每過從車馬動逾衆分飛無此歡會合杳如夢薄  
霜作微寒淺水未成凍秋花正爛斑幽鳥雜清嘒此邦

人事稠南北屢迎送以茲信宿間得與數君共遂將結  
吾廬念有用餘俸稍營負郭田畢力輸賦貢百齡欲過  
半來日頗自縱冀君數相存詩酒尚足用

本為東方生避世不避喧仍慕管夷吾畏事復畏言外  
物不可期高風難重論我辭金馬門君來西掖垣淮瀕  
一相見握手雙淚痕矜我鬢雪多歲月何崩奔默然念  
既往所遇皆籠樊恨不值羽人拂衣入桃源腰間銀青  
綬車上朱兩轡專城自不惡相思徒種萱

因言浙江潮憶上吳山尖八月天地空千里澄圓蟾海  
水為羣飛迅雷發幽潛壯士懷惴栗怯夫竊窺瞻春風  
潮水平青玉閉鏡奩輕舟載花女翠髮腰纖纖勝事冠  
東南君行獨能兼吾以狂自名將老無所嫌會當從君  
遊不計歲月淹鱸魚必令鮮釀酒勿使甜

嗷嗷南飛鴻羽翼何莘莘哀鳴衡山陽落影湘水濱歲  
晏道路長雪霜多苦辛豈無稻粱謀畢弋如魚鱗此鴈  
欲誰比正若羈旅人古來瘴癘地常有忠直臣扁舟慎

自將勿重蛟鼉噴鵬鳥惡似鴉端能伺承塵東風發衆  
芳宿莽熙陽春鴈歸君未歸悵望汀洲蘋

季孫肥

季孫事顛史禍起蕭牆內秦皇築長城滅國乃胡亥蒙  
公不正諫地脉豈其罪戰國尚權謀阿諛彼何怪親為  
聖人徒鄙陋曾莫解龜玉毀櫝中危顛竟誰賴鳴鼓詎  
可攻菹醢死無悔

約謝師直出獵師直小疾不行作詩戲之

雪後原野空風高弓矢勁歲時有陰殺自古順天令躍  
馬徑豐草呼鷹下空篋烈火生鼻端割鮮矧餘興此亦  
壯夫樂不與兒女並苦無枚叔辨試起夫子病

觀獵

立冬殺氣凝清霜會晨朝滌滌原野空烈烈荆棘燒鷹  
鷂肯為用馬寒意逾驕旌旗帶林莽笳吹含風颭突圍  
狡獸怒得雋壯士器老狐屈變詐文雉輸英翹討伐順  
天時未許窮姦妖翩翩馬上兒弓箭各在腰意矜百戰

雄巧鬪更相招控弦落明月飛鏑來九霄雖虐終無傷  
為樂固已饒晚臨清汝濱寒水如落潮揮壺酌美酒醉  
歸遺阜貂

雜詠四首

象樹日改色涼風下蕭森喬柯無定枝存葉非舊陰白  
露變凝霜百芳從此侵代謝不暫稽盛衰理相尋懸蟲  
自包藏棄巢絕來禽徘徊蒼苔地萬籟成哀音

短日不能永月華代揚輝暝暗來四隅稍復清影隨迅

迢河漢章天畢前南箕簸揚蹇無成掩兔今亦時

蒼蒼城隅草地勢元有在涼風西北來搖扞色已壞天  
運正消殺高明彼先罪安見中國葵淺智亦足賴

疾風吼籬端嘯呼隨叱吸翻翻走地葉袞袞強相及重  
門忽開扉窻寧如有入飛蓬自無根邂逅暫相集萬生  
共馮寓智愚因妄執區區古今士陳迹更綴緝是非竟  
何常得一已漏十歲晏莽無成白頭抱書泣

廣陵蔣生死十四年尸猶溫有妻子存嘗有書自

遠與其家

葉公是集  
亦有此題

三徑積荒草玉棺不上天  
初疑青竹墓有值吳門仙  
妻子同脫屣衣冠如蛻蟬  
何年獨鶴歸悲歌城市邊

曹司封詩

自我勝冠帶日聞鄉黨議  
意嫌風俗衰長老俱喻利  
緬懷千歲士未謂今昔替  
果哉曹大夫高度跨一世  
人皆競錐刀趨走候形勢  
強能弋公侯弱或丐奴婢  
而公獨長往亦豈惡富貴  
顧當拯頽波且以伸吾義  
昔在天聖

中太后猶稱制桓桓諫議公正色風憲地王室依老臣  
蕭牆屏姦計一麾竟諫守褒贈身後事至今誦遺烈每  
雪義士涕天倫見霜標粲粲真難弟大雅貴老成春秋  
有凡例吾將編野史著述二公志直清先伯夷退靜後  
季次願為得者規不使違者愧

驟雨

山川近淮秀風雨向秋急初為空曠游頓喜清涼集鳴  
蟬斷復續沙鳥飛還立平生耽勝事未暮俱可及

馳道

秦皇侈心極登眺窮阻修言從峽中度復欲滄海遊車  
轍去不反馳道缺每留君看鼎湖人尚畏軒轅邱

樹下

百芳與春違嘉樹成密葉上枝下相副朝影暮還接徐  
風氣清涼重露香浥裊關關變鳴禽杳杳飛孤蝶神仙  
彼何有靜境我心愜萬期猶視蔭寸景疑度劫何用窺  
蟠桃滄溟憚舟楫

過薦福寺

下馬喬樹陰雪霜寒未晞重門開相當廣殿晴日暉問  
僧亦何事荷鋤殊未歸勞生每多役向此情依依

分題李花得香字

尋幽興不淺佳木梢已芳積雪春未融明玉仍自香赤  
日照未好會待清月光念無瓊玖報聊復進雕觴

夏雨

邑居苦囂塵洒掃長不給蕭條一雨餘草木遍青濕靜

金少曰居名下  
卷四  
無浮埃生清有涼風入  
媿慙天地功人力那能及

馬死答劉先之


馬惡憂敗羣馬死遂徒步始知惡有用但愧非善御未  
能棄山野不得事藍輦猶當謀歛段尚取州里譽

顧亭林

逝者如去水賢達無復居  
竭來顧亭下但見林木疎  
魚鳥樂深淵風煙迷舊墟  
徒幸百世名歷歷存緒餘

齊魯

齊魯大儒師專門盛章句應物非已長何以責成務乃  
其忠孝心足以事君父不如商利徒反道趨詭遇剝床  
以及膚泉貨山嶽聚賜金稱百斤封邑成千戶若無天  
事變豈不厚且固商鞅既誅夷桑羊亦刀鋸寄言遂掖  
人施施幸安步



彭  
城  
集  
卷  
四